

საქართველოს კანონი

„სათამაშო ბიზნესის მოსაკრებლების შესახებ“ საქართველოს კანონში ცვლილების შეტანის  
თაობაზე

მუხლი 1. „სათამაშო ბიზნესის მოსაკრებლების შესახებ“ საქართველოს 2006 წლის 29 დეკემბრის №4250-რს კანონში (საქართველოს საკანონმდებლო მაცნე 2003 წელი №26, მუხლი 195) შეტანილი იქნას შემდეგი ცვლილება:

1. მე-5 მუხლის:

ა) „ა“ და „ბ“ პუნქტები ჩამოყალიბდეს შემდეგი რედაქციით:

„ა) თითოეულ სამორინეს მაგიდაზე – კვარტალში 20 000 ლარიდან 40 000 ლარის ჩათვლით;

ბ) თითოეულ სათამაშო აპარატზე – კვარტალში 2 000 ლარიდან 4 000 ლარის ჩათვლით;“;

ბ) „ე“ პუნქტი ჩამოყალიბდეს შემდეგი რედაქციით:

„ე) სისტემურ-ელექტრონული ფორმით მოწყობილ თამაშობაზე – კვარტალში 100 000 ლარიდან 120 000 ლარის ჩათვლით;“

გ) „ზ“ და „თ“ პუნქტები ჩამოყალიბდეს შემდეგი რედაქციით:

„ზ) აზარტული ან/და მომგებიანი თამაშობის მოწყობის ნებართვით ორგანიზებული ობიექტის გარეთ განთავსებული, სისტემურ-ელექტრონული ფორმით მოწყობილი აზარტული ან/და მომგებიანი თამაშობის თითოეულ სალაროზე – კვარტალში 1 500 ლარიდან 20 000 ლარის ჩათვლით;

თ) თითოეულ კლუბის მაგიდაზე – კვარტალში 4 000 ლარიდან 14 000 ლარის ჩათვლით.“.

მუხლი 2. ეს კანონი ამოქმედდეს 2017 წლის პირველი იანვრიდან.

## განმარტებითი ბარათი

„სათამაშო ბიზნესის მოსაკრებლების შესახებ“ საქართველოს კანონში ცვლილების შეტანის თაობაზე“ საქართველოს კანონის პროექტთან დაკავშირებით

ა) ზოგადი ინფორმაცია კანონპროექტის შესახებ:

ა.ა) კანონპროექტის მიღების მიზეზი:

სათამაშო ბიზნესის სფეროში სათამაშო ბიზნესის მოსაკრებლების ოდენობის ოპტიმიზაციის აუცილებლობა.

ა.ბ) კანონპროექტის მიზანი:

სათამაშო ბიზნესის სფეროში სათამაშო ბიზნესის მოსაკრებლების ოდენობის ოპტიმიზაცია და სახელმწიფო ბიუჯეტის შემოსავლების გაზრდა.

ა.გ) კანონპროექტის ძირითადი არსი:

კანონპროექტის მიხედვით იზრდება სათამაშო ბიზნესის მოსაკრებლის განაკვეთები.

კერძოდ, მოქმედი კანონმდებლობით თითოეულ სამორინეს მაგიდაზე სათამაშო ბიზნესის მოსაკრებლის განაკვეთის ოდენობა განსაზღვრულია კვარტალში 15000-დან 30000 ლარის ჩათვლით. კანონპროექტის მიხედვით - განისაზღვრება 20 000-დან 40 000 ლარის ჩათვლით.

თითოეულ სათამაშო აპარატზე მოსაკრებლის განაკვეთი მოქმედი კანონმდებლობით განსაზღვრულია 1500-დან 3000 ლარის ჩათვლით. ცვლილების შესაბამისად - განისაზღვრება კვარტალში 2 000-დან 4 000 ლარის ჩათვლით.

სისტემურ-ელექტრონული ფორმით მოწყობილ თამაშობაზე მოსაკრებლის განაკვეთი დღეს მდგომარეობით არის 30 000 ლარიდან 60 000 ლარის ჩათვლით. კანონპროექტის მიხედვით განისაზღვრება 100 000 -დან 120 000 ლარის ჩათვლით.

აზარტული ან/და მომგებიანი თამაშობის მოწყობის ნებართვით ორგანიზებული ობიექტის გარეთ განთავსებული, სისტემურ-ელექტრონული ფორმით მოწყობილი აზარტული ან/და მომგებიანი თამაშობის თითოეულ სალაროზე მოსაკრებლის განაკვეთია კვარტალში 1 000 ლარიდან 15 000 ლარის ჩათვლით. კანონპროექტის მიხედვით განისაზღვრება **1500 - დან 20 000 ლარის ჩათვლით.**

თითოეულ კლუბის მაგიდაზე მოსაკრებლის განაკვეთი კვარტალში არის 3 000 ლარიდან 10 000 ლარის ჩათვლით. კანონპროექტის მიხედვით განისაზღვრება **4 000- დან 14 000 - ლარის ჩათვლით.**

აღნიშნულიდან გამომდინარე, შესაბამისი ცვლილება განხორციელდა კანონის მე-5 მუხლში.

ბ) კანონპროექტის ფინანსური დასაბუთება

ბ.ა) კანონპროექტის მიღებასთან დაკავშირებით აუცილებელი ხარჯების დაფინანსების წყარო:

**კანონპროექტის მიღება არ არის დაკავშირებული ხარჯებთან.**

ბ.ბ) კანონპროექტის გავლენა ბიუჯეტის საშემოსავლო ნაწილზე:

წინა წლების შემოსავლების ანალიზის საფუძველზე, კანონპროექტი სავარაუდოდ გამოიწვევს ადგილობრივი თვითმმართველი ერთეული ბიუჯეტის საშემოსავლო ნაწილის დაახლოებით 20.0 მლნ ლარით გაზრდას.

ბ.გ) კანონპროექტის გავლენა ბიუჯეტის ხარჯვით ნაწილზე:

**კანონპროექტის მიღება გავლენას არ მოახდენს ბიუჯეტის ხარჯვით ნაწილზე.**

ბ.დ) სახელმწიფოს ახალი ფინანსური ვალდებულებები:

**კანონპროექტის მიღება არ წარმოშობს ახალ ფინანსურ ვალდებულებებს.**

ბ.ე) კანონპროექტის მოსალოდნელი ფინანსური შედეგები იმ პირთათვის, რომელთა მიმართაც ვრცელდება კანონპროექტის მოქმედება:

**კანონპროექტით იზრდება სათამაშო ბიზნესის სფეროში სათამაშო ბიზნესის მოსაკრებლების ოდენობა, რაც შესაბამისად აისახება აზარტული და მომგებიანი თამაშობების მომწყობი პირების ფინანსურ შედეგებზე.**

ბ.ვ) კანონპროექტით დადგენილი გადასახადის, მოსაკრებლის ან სხვა სახის გადასახადის ოდენობის განსაზღვრის წესი (პრინციპი):

**კანონპროექტით იცვლება მოსაკრებლის ოდენობა, მაგრამ არ იცვლება მოსაკრებლის ან სხვა სახის გადასახადის ოდენობის განსაზღვრის წესი (პრინციპი)**

გ) კანონპროექტის მიმართება საერთაშორისო სამართლებრივ სტანდარტებთან

გ.ა) კანონპროექტის მიმართება ევროკავშირის დირექტივებთან:

**კანონპროექტი არ ეწინააღმდეგება ევროკავშირის დირექტივებს.**

გ.ბ) კანონპროექტის მიმართება საერთაშორისო ორგანიზაციებში საქართველოს წევრობასთან დაკავშირებულ ვალდებულებებთან:

**კანონპროექტის მიღებით არ წარმოიქმნება საერთაშორისო ორგანიზაციებში საქართველოს წევრობასთან დაკავშირებული ვალდებულებები.**

გ.გ) კანონპროექტის მიმართება საქართველოს ორმხრივ და მრავალმხრივ ხელშეკრულებებთან:

**კანონპროექტის მიღება არ ეწინააღმდეგება საქართველოს ორმხრივ და მრავალმხრივ ხელშეკრულებებს.**

დ) კანონპროექტის მომზადების პროცესში მიღებული კონსულტაციები:

დ.ა) სახელმწიფო, არასახელმწიფო ან/და საერთაშორისო ორგანიზაცია/დაწესებულება, ექსპერტები, რომლებმაც მონაწილეობა მიიღეს კანონპროექტის შემუშავებაში, ასეთის არსებობის შემთხვევაში:

**ასეთი არ არსებობს**

დ.ბ) კანონპროექტის შემუშავებაში მონაწილე ორგანიზაციის (დაწესებულების) ან/და ექსპერტის შეფასება კანონპროექტის მიმართ, ასეთის არსებობის შემთხვევაში:

დ.გ) კანონპროექტის ავტორი:

**საქართველოს ფინანსთა სამინისტრო.**

დ.დ) კანონპროექტის ინიციატორი:

**საქართველოს მთავრობა.**

## იმ მუხლების მოქმედი რედაქცია რომლებშიც ცვლილებები შედის

მუხლი 5. მოსაკრებლის განაკვეთები +

სათამაშო ბიზნესის მოსაკრებლის განაკვეთების დიფერენცირება ხდება სათამაშო ბიზნესის სახეობის მიხედვით და განისაზღვრება:

ა) თითოეულ სამორინეს მაგიდაზე – კვარტალში 15 000 ლარიდან 30 000 ლარის ჩათვლით;

ბ) თითოეულ სათამაშო აპარატზე – კვარტალში 1 500 ლარიდან 3 000 ლარის ჩათვლით;

გ) (ამოღებულ ია – 09.12.2011, №5453);

დ) თითოეულ წამახალისებელ გათამაშებაზე – საპრიზო ფონდის 10%;

ე) სისტემურ-ელექტრონული ფორმით მოწყობილ თამაშობაზე – კვარტალში 30 000 ლარიდან 60 000 ლარის ჩათვლით ;

ვ) ლატარიების მოწყობაზე – ლატარიის ბილეთების რეალიზაციიდან მიღებული ამონაგების არა უმეტეს 20%-ისა;

ზ) აზარტული ან/და მომგებიანი თამაშობის მოწყობის ნებართვით ორგანიზებული ობიექტის გარეთ განთავსებული , სისტემურ-ელექტრონული ფორმით მოწყობილი აზარტული ან/და მომგებიანი თამაშობის თითოეულ სალაროზე – კვარტალში 1 000 ლარიდან 15 000 ლარის ჩათვლით;

თ) თითოეულ კლუბის მაგიდაზე – კვარტალში 3 000 ლარიდან 10 000 ლარის ჩათვლით.

შენიშვნა: თუ სამორინეს მოწყობის ნებართვის მფლობელი კლუბის მაგიდას მხოლოდ აზარტული ტურნირის ჩატარებისათვის იყენებს, იგი უფლებამოსილია არ გადაიხადოს ამ ქვეპუნქტით გათვალისწინებული სათამაშო ბიზნესის მოსაკრებელი.